


蘇州府志

卷五十二





蘇州府志卷第九十二

人物十九

崑山縣

明

周恭

子可立

孫世昌

沈訥

葉盛

鄭壬

鄭文康

周泰

子鄂

孫瓊

子裕

沈祥

子時

孫信

徐任

梁棟

子昱

昱子紘

支琮

朱旻

中國社會科學院  
南京研究所藏



王銘 諸樂耕

周南

夏璣 子漳

孫宗

王鑑 子漳

錢用 祖鼎 父玠 子稷

朱萱 子爰

王詒

陸鈇 子爰

王庭

張潮 石璞 邵魯生 張翼 戚軒

陸鑑

高敞 子蘭

張汝舟 弟汝粟 子擢秀

吳瑞

秦璫

吳愈

高以政

管琪

宋棫

盛洪

闕雲

王秩

朱文

馮景琨 父鈇 子夢龍

徐協祥 王鐵匠

張安甫

毛澄

周在

朱希周

顧潛

龔乾

周鳳倫

龔震

顧鼎臣 子履方 履方子謙

陳汝翊 父奎

魏校

周廣 子士淹

張寬 祖注 父鑾

黃雲



沈濤 彭餘璋

方鳳

柴奇

周鳳鳴

魏庠 子希直

屈儒

張寰

朱景運 父希陽

尤敷 弟敬

顧夢川 子九暉 九烈

方鵬

邢桂 士

周震 文達

顧濟

張羽

王同祖

徐申

顧邦石 父式

顧夢圭 子九默

陸冕

晉憲 父鵬 子驥

王爚

朱觀

沈大楠 子紹慶 孫應明

秦鰲

周果

梁鳴鸞

王三錫

孫雲

吳中英

周復俊

陸郊

秦雷

陶文淵

周大禮

王三接

鄔景和 從兄克忠



蘇州府志	卷九十二	人物十九	崑山縣	明
周恭	字寅	之博洽	羣書為詩	古雅典則
甘貧	養晦	投徒市藥	以自給	時與高人
逸士	談論	古今	以士風	民俗為念
性嗜	梅數畝	之宅	環樹以梅	自號梅花
主人	邑令	方豪	欲見之力	辭不赴
豪書	鹿門	二字	以扁其居	所作八哀
詩盛行	於世子	可立	字必禮	以貢官
鄒平	王府	教諭	性剛直	篤於孝
友孫	世昌	嘗修崑山	志邑令	申思科
序而梓	之	康熙志	參道光	崑新志

蘇州府志卷第九十二

人物十九

崑山縣

明



周恭字寅之博洽羣書為詩古雅典則甘貧養晦投徒市藥以

自給時與高人逸士談論古今以士風民俗為念性嗜梅數

畝之宅環樹以梅自號梅花主人邑令方豪欲見之力辭不

赴豪書鹿門二字以扁其居所作八哀詩盛行於世子可立

字必禮以貢官鄒平王府教諭性剛直篤於孝友孫世昌嘗

修崑山志邑令申思科序而梓之康熙志參道光崑新志



沈訥字文敏愚弟正統七年進士授大理評事陞寺副景泰元年出爲福建僉事督松溪銀冶正額外不求羨餘盜起慶元入松溪界訥以計擒之得不滋蔓五年鄭懷旨復亂訥在政和得報卽集衆勦捕縛其渠帥尙書孫原貞上其功天順二年遷副使歲餘卒樞還之日閩人悲號擗踊遮道不能行訥身不踰中人而天性明敏每聽獄兩喙爭譟訥一言折之無不得其情志尙高潔爲文章必貴已出

姑蘇志參  
王志堅傳

葉盛字與中正統十年進士授兵部給事中師覆土木諸將多遁還盛率同列請先正扈從失律者罪且選將練兵爲復讐計郟王卽位例有賞賚盛以君父蒙塵辭不許也先迫郟城

請罷內府軍匠備征操又請令有司儲糧料給戰士遣散卒取軍器於天津以張外援三日問章七八上多中機宜寇退進都給事中言勸懲之道在明賞罰敢戰如孫鏜死事如謝澤韓青當賞其他守禦不嚴赴難不力者皆當罰大臣陳循等議召還鎮守居庸都御史羅通并留宣府都督楊洪掌京營盛言今日之事邊關爲急在者獨石馬營不棄駕何以陷土木紫荆白羊不破寇何以薄都城今紫荆倒馬諸關寇退幾及一月尙未設守禦宣府爲大同應援居庸切近京師守之尤不可非人洪等旣留必求如洪者代之然後可以副重寄而集大功帝是之尋命出安集陳州流民景泰元年還朝



言流民雜五方其情不一雖幸成編戶而鬪爭讐殺時時有之宜專官綏撫又言畿輔旱蝗相仍請加寬卹帝多採納京衛武臣及其子弟多驕惰不習兵盛請簡拔精壯備操守京城勲戚所置布歷月徵稅盛以國用不足請籍其稅佐軍餉皆從之明年上弭災防患入事帝以兵革稍息頗事宴遊盛請復午朝故事立報可當是時帝虛懷納諫凡六科聯署建請多盛與林聰爲首廷臣議事盛每先發言往復論難與議大臣或不悅曰彼豈少保耶因呼爲葉少保然物論皆推盛才擢右參政督餉宣府尋以李秉薦協贊都督僉事孫安軍務初安嘗領獨石馬營龍門衛所四城備禦英宗旣北狩安

以四城遠在塞外勢孤奏棄之內徙至是廷議命安修復盛與闢草萊葺廬舍庀戰具招流移爲行旅置煖鋪請帑金買牛千頭以賦屯卒立社學置義冢療疾扶傷兩歲間四城及赤城鵬鶚諸堡次第皆完安由是進副總兵而守備中官弓勝害安奏安疾宜代帝以問盛言安爲勝所持故病今諸將無踰安者乃留安且遣醫視疾已又劾勝卒調之他鎮英宗復位盛遭父憂奔喪天順二年召爲右僉都御史巡撫兩廣乞終制不許瀧水獠鳳弟吉肆掠督諸將生擒之時兩廣盜蜂起所至破城殺將諸將怯不敢戰殺平民冒功民相率從賊盛以蠻出沒不常請自今攻劫城池者始以聞餘止頌奏



疏至兵部駁不行盛與總兵官顏彪破賊砦七百餘所彪頗濫殺謗者遂以咎盛六年命吳禎撫廣西而盛專撫廣東憲宗立議事入都給事中張寧等欲薦之入閣以御史呂洪言遂止而以韓雍代撫廣東初編修邱濬與盛不相能大學士李賢入濬言及是草雍敕曰無若葉盛之殺降也盛不置辨稍遷左僉都御史代李秉巡撫宣府請量減中鹽米價以勸商裕邊復舉官牛官田之法墾田四千餘頃以其餘積市戰馬千八百匹修堡七百餘所邊塞益寧成化三年秋入爲禮部右侍郎改吏部出振真定保定饑議清莊田分養民間種馬置倉涿州天津積粟備荒皆切時計滿都魯諸部久駐河

套兵部尙書白圭議以十萬衆大舉逐之沿河築城抵東勝徙民耕守帝壯其議敕盛往會督撫詳議盛知時無良將邊備久虛河套未可輕議乃會諸臣上疏言守爲長策如必決戰亦宜堅壁清野伺其情歸擊之令一大創庶可遏再來又或乘彼入掠遣精卒進搗其巢令彼反顧內外夾擊足以有功然必守固而後戰可議也帝善其言而圭主復套師出竟無功人以是服盛之先見八年轉左侍郎十年卒賜祭葬諡文莊盛清修積學尙名檢簿嗜好家居出入常徒步生平慕范仲淹堂寢皆設其像志在君民不爲身計有古大臣風

明史

鄭壬字有林宋龍圖閣學士大中九世孫南渡時舉族南遷後



徒崑山世為帶下醫壬天性孝友沈毅簡重博學強記精醫術母年高不能行特作板輿與家人舁之隨所往來如是者數年迨歿治喪不作佛事歛舍葬祭一如朱氏禮兄亡無後事寡嫂如母嫁其孤女不異已出重修世譜建葺祠堂務循禮制鄉人稱為雙松先生康熙志參 乾隆志

鄭文康字時又壬子長身偉軀目光眈眈射人尚友古人氣蓋一世登正統戊辰進士觀政大理寺聞父病請歸養未抵家而父亡母亦尋卒文康悲悼數年加苦宿疾遂不復仕家居枕藉經史雖病不少休尤善經生義出其門者多取科第好談忠孝節義表善興賢闡幽弔古若嗜欲然為詩文頃刻數

千百言稿成輒為人持去其存者有平橋集多記載時事有益勸懲而文尤簡質有法度王張二傳列朝詩集舊縣志合纂 王志堅曰文康嘗自言少時有友十人日以倡和講學游從為事當時有忌者呼為十

者沈愚及弟魯自有傳陳助見陳皞傳周叙字叔倫以貢官主簿張謙字克讓以貢官知縣夏祐字存賢以薦官鑄印大使沈祥亦有傳黃据呂穆皆隱居不仕据鐸之子也又有周號者文康妹婿工篆隸及畫梅凡文康弔古探奇之事皆為之佐

周泰字存敬正統丁卯領鄉薦授烏程訓導陞楚東安王府教授王二子異母同日生王愛少者序立稱謂皆先其長泰因

玉牒啟王曰殿下愛之耶故宜安之王知不可奪遂從其序後轉蒙陰教諭致仕泰高介絕俗所居去縣治不十步絕不



造令丞簿有不識面者子鄂字楚英以諸生歲薦授廣西都

司斷事廣西古象郡地險遠戍者多道亡都司輒械解者付

獄多瘐死鄂請給文令還本貫追獲復解戍補而解者不累

遠近德之擢萬州知州

張大復傳參道光崑新志

孫瓊字蘊章其先長洲陸氏以父後崑山孫道庠遂冒孫姓家

崑山瓊舉正統戊辰進士授刑部主事歷員外郎郎中凡十

五年公廉平恕如一日故事每歲中以通問罪犯類報尙書

選諸郎明慎者重加審錄瓊被選及引對內廷無一人稱冤

者江西安福彭姓泰和龍姓蕭姓爲邑人所訐奏詞連數十

百人尙書屬瓊往治之悉得其實置於法監生王喜爲盜所

攀久繫不決一鞫得其實立出之每出署被訊者羅拜馬首

常數十人曰是能生吾者也天順中錦衣指揮門達恃寵黷

貨用苛刻羅織人罪既抵部郎官莫敢異惟瓊多所平反太

監牛玉假子犯法屬瓊瓊不少貸由是積怨權貴竟以同官

得罪連坐謫戍遠左成化初復官月餘卽乞致仕年僅四十

家居篤於禮度終日端坐未嘗傾側所居樸陋人不能堪而

處之裕如喪祭極其哀感每旦必衣冠拜先祠非疾不廢子

裕乙未進士官終知州

姑蘇志參王志堅傳

沈祥字應禎登正統戊辰進士授刑部主事遷工部員外郎英

宗以杭州袍服不如法且後期震怒詔逮工匠赴部議罪祥



抗言於尚書曰造作違法罪在所司諸工匠皆貧人六月觸暑纍繫就道死亡必多公爲大臣宜爲朝廷惜百姓言畢出稿懷中立堂下不退尚書爲具奏事得寢遷四川參議督六衛糧儲持以嚴密積弊肅清移疾歸家居二十餘年始卒子時字元中成化丁未進士初知餘干縣後知泰和所至多善政泰和邑志稱其剛直不撓勢豪斂戢善人得安云孫信字循初弘治丙辰進士

康熙志參道  
光崑新志

徐任字惟用世居婁東父彥輝宣德中卒於京邸任扶櫬旋里日夕悲號繼之以血母楊疾每夜露禱北辰三劫其股作糜以進疾漸瘳人稱孝感

道光崑  
新志

梁棟父孟鏞洪武中爲館陶主簿指衆食貧乃贅其少子鏞民家母意甚憐嚙鏞背識之灑淚而別孟鏞旣卒棟思鏞不置白母詣館陶已失主家所在嗚咽奔還爾後隨所至輒求之垂三十年後以事寓華亭東禪寺會大雨有僧袒而決渠露痕痕棟見心動就與語卽鏞也載與歸相友愛終其身子昱字文輝性持重初婚三日喪父茹淡寢苦竟禫除不入寢舍正統丁卯領鄉薦授平定州知州省刑緩賦州民德之卒於官歸櫬之日哭聲載道孟羹瓦飯相望子紘字尙素成化辛卯鄉舉通判漳州陞泉州同知愷悌清勤兩平巨寇民爲立

石頌德

張大  
復傳



支琮字敬將諸生家貧奉母不能具純綿冬寒母不能寐輒取已所服青袍覆母疊跣而坐有郡倅慕其為人凌晨往候之母睡方熟恐驚動不敢啟竟以短衣出見倅知其故歎息而去巡撫周忱聞之粟帛正統間以貢選為南京留守衛經歷

張太復傳

朱旻字希仁年十九領正統甲子鄉薦將上春官別母母曰兒必頂進賢冠見吾旻跪受教比試中乙榜念母命不冠不敢歸遂謁選授諸暨訓導歷浮梁遷昌平教諭天順末圍獵近郊前驅將逼陵寢旻在昌平上疏言天壽諸陵歷聖神靈式臨法宜安靜而負羽之徒時有馳驟不無震搖上愕然戒有

司勿獵著為令調臨川石首兩縣教諭連主山東河南陝西

鄉試得人稱盛門人王約按吳立坊表之

康熙志

王銘字與新居度城景泰甲戌東南大饑且疫詔下有司凡民輸粟者授以冠帶時邑令鄭達初下車民皆向之求食填塞衢路民哭達亦哭乃連日夜走鄉郭民家饒裕者入門勸諭官立質券貸穀給饑民粥銘首輸粟五百石一鄉賴以生詔賜七品服同時有諸樂耕居瀾漕里亦輸粟七百斛有司以聞授冠帶為義官

道光新志

周南字元凱世居石浦以力田致饒裕有司選長鄉賦率先公後私善催科均徭役事集而民不擾景泰乙亥夏旱民病南



告於部使者曰苗稿矣非除田租民將去其土部使者上書  
得旨蠲停南日租雖除如目前饑饉何發私粟賑之民賴以

活道光崑  
新志

夏璣字德乾景泰甲戌進士授應城知縣母喪服闋補新淦商  
稅引錢積至千兩舊例皆以充公用璣悉籍以備賑富人周  
某殺人璣置之獄周賂當道欲出之璣不可無何調大庾璣  
去富人乃得出新淦民爲立生祠擢爲御史出清軍浙江籍  
無漏者而民不擾以疾告歸杜門簡出日惟養親爲悅璣性  
好飲在應城嘗醉後撻人母戒之已而母亡遂終身不飲家  
居四十年未嘗輕入公府兄弟三人皆先卒遺孤纍纍同居

其爨婚嫁之費皆出於璣自奉簡儉食無重味出無輿馬清

修苦節終始如一曰王志  
堅傳

孫宗字公武其先長洲陸氏宗幼爲崑山孫道庠繼子遂冒其  
姓以貢知懷柔縣調湘潭湘民怠於本業宗親行勸課之市  
廛失火勢不可爲再拜籲天火尋滅凡獻獄救荒征賦力役  
之事皆簡當有法祭酒劉崇時以藩寮按部特書廉勤二字  
旌之道光崑  
新志

王鑑字與修以詩經舉天順壬午鄉試好讀尙書謂二帝三王  
之道在此大書忠孝二字於壁以自勵成化時上春官卒於  
逆旅同年陸某視其瞑執陸手語之殮我必以尙書殉手遺



其子漳書曰爾祖以千金付我汝仲父二孤尚幼我緘而藏之某柱下書到即付孤去無他囑勉思壁上二大字而已漳

得書發柱不開緘而與之君子稱廉孝焉

康熙志

錢用字尚賓天順時以貢授三河教諭旌勤警惰多所造就歲

大旱民艱食用白御史發廩賑之有張甲者諸姪利其貲誣

以死罪用白於縣令王景景悟置不問歲餘甲生子名之以

錢署宜黃縣事民皆悅服陞贛州府教授署府事永豐羅倫

手書履素二字贈之以母老乞歸

道光崑新志

朱萱字樹之天順八年進士授大理評事萱能詩歌筆翰皆有師法而泊然自守年輩有第望劣於萱而位出其右者眾或

不平萱曰出處固有命耳略無愠色以疾乞歸卒葉盛為誌

其墓深惜其不究用焉

王志堅傳

王詒字資學元崑山知州安貞五世孫世居邑之縻蘿涇祖鼎

父玠俱以義俠聞詒性質慤不暱人是非嘗於縣門前拾遺

金坐待至暮愀然返凌晨仍候得失金人而還之姑之女為

都昌王妃姑暴卒親屬爭分其囊詒惟取一海貝語其子曰

吾取此者恐拂人意耳母之叔陸槩家富無子以田產僮僕

造門授之欲得詒子為繼力辭不受訪其宗屬為之後二子

秩稷既筮仕必一詣其署誠之曰貧乏是好消息也平居布

衣徒步不惑二氏秩自有傳稷字惠叔成化丙午舉人自麗



水令累官象州牧少時以兄為師友恭至老無間

道光崑新志

陸欽字鼎儀少與太倉張泰陸容齊名號婁東三鳳舉天順八

年會試第一成化二年殿試第二授編修預修英宗實錄遷

修撰侍皇太子講讀欽進退閑雅敷奏明暢滿九載擢諭德

孝宗立進太常少卿兼侍讀充經筵日講官得疾乞歸卒詔

賜祭葬官其子爰中書舍人欽在詞林以端謹清峭稱其為

文簡勁有法詩亦如之爰字子引負才喜聲詩作字端勁屢

使藩府饋遺無所受忤劉瑾致仕後起原官遷禮部主事

明史

姑蘇志王志  
堅傳合纂

王庭字元直少學於葉文莊文莊甚器之天順六年領鄉薦授

鄞州學正遷國子學錄再遷藩王府右長史卒庭孝友廉慎

在鄞時就民田耕以自給諸生束修無所取律身教人動以

古道在王府尤得輔導之正嘗考試江西御史欲試諸考官

庭獨不就試御史卒用以主試曰是不苟人也庭生平自負

剛直百撓不因其學貴踐履不事辭章常曰徐穉管寧不能

詩而世仰其名時以為名言

姑蘇志

張潮字思信嚴毅雅飭自幼嗜學尤精於書隱居授徒未嘗輕

出邑令歲舉鄉飲一至城郭見者知敬同時有石璞字元素

蕭散不羈翛然塵外尤善吟咏所著多關民風裨世教者晚

年喜畫山水思致非俗工可及邵魯生字師聖力學自樹資



舌耕以養母晚築春水草堂吟哦其中與潮璞同居里閭鄉稱三老又有張翼字汝敬戚軒字宗軾皆工詩業文教授鄉里有隱者之風並成化時人也

丑志 堅傳

陸鑑字汝昭其先世戍洱海例應輸值兄鏞往代鑑獨與母居發憤讀書領成化乙酉鄉薦遷東昌府通判會轉運京師鉤得弊孔餘鏹千計明年再往亦如之有能吏名念母不逮養兄戍萬里外時為流涕繪風木鵠原圖見志遂致仕兄戍滿

迎歸與同寢食以終

道光崑新志

高敞字德廣成化壬辰進士授禮部主事歷員外郎郎中再使遼府行冊封禮還賞資大同將士咸稱職陞順天府丞弘治

初畿內大饑請發內帑十萬賑之進應天府尹或勸以綜覈者曰吾於事務理其緒急而張之雅非吾性人服其有體亡何病卒幾不能殮御史王倬部郎王秩相與賻其喪上聞深惜之賜祭葬

張大復傳

張汝舟字濟民成化甲午舉人授南昌府同知憲王宸濠驕橫凡仕於其地者指為畏途汝舟至以清嚴著宸濠始欲致之汝舟修溫太真祠以見志宸濠好鶴適為民家犬所傷折其足既笞掠其民又告汝舟言鶴故有牌民乃縱犬斃鶴汝舟笑曰鶴即帶牌其如犬不識字何判而釋之藩府嬖人之兒為盜就縛嬖人中夜泣宸濠為之請汝舟唯唯卒置之法宸



濠嘗以失火給汝舟往救將害之汝舟抵府門曰正殿災當親赴若延燒旁舍一隸人事耳遂不入武寧知縣馮某以貪殘為民所告當道與馮有連使人來屬汝舟不從劇賊徐九齡嘯聚建昌憲司檄汝舟往討接戰被創益設方略卒殲之遷思南知府更以簡靜為治清浪都督趙某貪暴杖殺指揮李某李子訴於朝趙素結交權要王者畏之以事屬汝舟汝舟無所撓卒致其罪死於獄任滿當遷一夕夢其母悴甚且廢明急請致仕歸果如所夢云家居田僅百畝而待族人鄉黨皆有恩誼弟汝粟癸卯舉人知定海縣子擢秀嘉靖辛卯舉人知廣平縣

王志堅傳

吳瑞字德徵成化乙未進士授南京吏部主事改工部出理徐州洪邳商人餽金歷郎中督理河運鑿高郵巖社湖左腹河四十餘里以免覆溺之患復上疏請蠲所鑿田賦額以疾乞歸絕意仕進凡二十年瑞遂於易尤工古文詞子蘭弘治己未進士官御史

黃雲誌參舊縣志

秦瓛字廷贊成化乙未進士授刑部主事陞員外郎郎中御史彭程因言事繫獄瓛首白其無罪弘治庚戌兩廣巡撫秦紘劾安遠侯柳景鎮守不法事上命瓛往勘之瓛至悉發景奸景懼誣以與紘有私上命廷臣會問午門外卒抵景法紘尋起為尙書一時公論倚以為重陞貴州副使以公便省母遂



不樂仕放情邱壑間家貧枯魚麥飯對客忻然詩文俊逸無

塵人傳誦之

王志堅傳

吳愈字惟謙凱子成化乙未進士授南京刑部主事歷員外郎中初凱起家刑曹每爲愈言折獄之道愈在部繙閱舊牘遂精法律一時奏讞咸倚以決出知敘州府慶符盜劫縣治令捕得二十七人已誣服愈疑之乃詣縣辨審釋二十五人未幾果獲真盜上官安熬以馬湖叛衆議用兵愈策曰熬無遠謀然其甲兵精利未易敵也彼中無水當重圍以困之議未決而熬忽棄城走衆慮其糾諸夷爲亂愈曰彼以郡守將兵接戰勝負未可知既離巢穴一窮寇耳諸夷皆其仇又何能

爲因遣人襲之不血刃而獲自是馬湖改置流官後其黨復劫府印爲亂愈親抵其巢諭之遂獻印解散在敘九年遷河南參政兼理屯田先是藩府占匿屯田以千萬計屢詔御史直之彌連不可問愈剴剔鉤校多所釐正有蜚語中之者遂

自免歸

文徵明誌參王志堅傳

高以政字養民少孤鞠於祖成化丁酉領鄉薦選上杭令會閩盜竊發黠吏借以羅織富民武平民賣羊於市誣以盜繫獄以政視籍無買羊者名姓立出之械陷者示於眾白沙里人溫文進聚衆稱亂以政督鄉兵設計擒之考績歸遂致仕題所居曰宜晚自號歸田竭力孝養性溫和樂易無疾言遠色



無子以趙氏甥為後道光崑新志

管琪字儒珍器宇寬厚律身清謹成化戊戌進士授中書舍人

歷官湖廣左布政使羨餘一無所取會入覲不事干謁眾頗

不悅有勸其少通關節者琪以貧緣求用為恥作書卻之竟

以年老致仕王志堅傳

朱棣字良用成化辛丑進士授蕭山知縣均徭息訟扶善鋤強

縣有湘湖久為豪右所占棣浚之以時蓄洩湖田大稔立丁

田法諸州縣皆踵行之擢南京御史與同官劾文選郎貢欽

招權納賂罷之又因災異上疏切指時政秩滿便道省母卒

於家張大復傳

盛洪字思禹頤曾孫成化甲辰進士授刑部主事歷員外郎中

三按大獄事皆涉中貴或為難之洪悉論如法然用心平恕

每語人曰刑官當於死中求生不當於生中求死擢廣東海

道副使先是通番買港之徒騷擾驛傳至是屏絕市舶中官

利通私貨或置酒羅列珍玩惟其所欲或託僚友夜以黃金

餽之洪拒不納禁益嚴由是怨謗沸騰終不為動又上疏論

通番奸弊及保安事宜劉瑾欲中傷之無所得乃以添設例

裁缺免歸尋以海道舊事檄召赴廣已擢山東按察使洪已

卒於道矣洪歷任二十餘年不殖厚產所居蕭然人以為難

王志堅傳



闕雲字時望成化丙午舉人授餘干知縣政尚慈惠歿後祀名宦立循良世顯坊於餘干東關外

道光崑新志

王秩字循伯成化丁未進士授永康知縣有富民業腴田而飛稅貧人者訟久不決秩躬行阡陌第其甲乙而賦之夙弊頓清入爲南京兵部主事遷刑部員外郎轉廣東僉事被檄征勦廣西叛蠻懷戢黎人威名特起進參議事平陞江西副使備兵南贛劇盜張士錦竊據名號秩生擒以歸諸盜相繼來降令降者免死量材授職僞黨悉平又議通鹽法民省轉輸而軍興不乏遷本省按察使桃源盜起副使周憲與戰陷陣死秩督兵進討立斬害憲者搗其巢且戒軍無屠戮全活甚

眾寧庶人有異志憚秩嘗邀秩幼子入抱置膝上許以郡王妻之秩謝不敢當歸謂家人曰王志滿氣揚必且爲亂不出

十年矣尋擢雲南布政使以侍養歸暴疾卒

王志堅傳參道光崑新志

朱文字天昭夏之子成化甲辰進士觀政吏部連喪父母弘治時授雲南道御史出清軍兩廣先是理戎籍者以搜括隱匿多寡爲殿最文洞燭姦僞稽審持平雖斷歸戎籍莫不心服博羅軍陸某妄指鄉人兄弟二人爲族資其費不得遂誣爲故軍陳羅二姓子皆其從祖養子今二姓絕當還本役文曰養子安用兩人兩人又何以適爲絕軍之後其人乃服還朝特命侍經筵再按福建務持大體延建二郡歲輸興泉軍儲



二萬有奇以其險且遠也至其地糴米民緣為奸軍恆苦飢  
 文命擇官輸值與泉視歲之豐儉定其值且儲贏以備凶年  
 弊遂絕部民吳孟田治海船商人倪四僱以市外番以通番  
 坐死者十八人文署其贖因吳造船而不市番倪市番而未  
 嘗造船皆無死律竟出其罪嘗濬閩河湮塞者二十餘里民  
 輸賦者悉免負擔之費城中食貨駢集物價頓減又為湖廣  
 副使疑獄多所平反奉檄造歲楮於衢南直巡撫包澤私有  
 所屬不從遂齟齬之聽調歸旋改雲南即引疾乞歸道光崑  
 新志  
 馮琨字君美父鈇字仲舉少孤力學每時祭嗚咽不勝悲感閩  
 里舉天順壬午鄉薦授東安教諭嘗校文河南江西皆稱得

士琨舉成化丙午鄉試任永康教諭遷薊州知州勲戚貴嘗  
 奪民牧馬地為莊園琨按籍覈之盡還諸民勲貴怒誣奏琨  
 逮下詔獄琨列主名幾何影占幾何分別言之上咨嗟良久  
 即令復職武宗即位逆瑾用事再收下錦衣獄杖八十絕而  
 復蘇械坊官所薊民挈榼餽餉不絕有僧言於瑾曰馮知州  
 惟飲薊州一杯水非百姓愛而餉之死圍土矣瑾愕然釋還  
 薊州遷杭州同知再轉兩浙運同擢登州知府清操彌厲未  
 二載棄官歸子夢龍字翔甫以歲薦選應天府訓導遷潁上  
 教諭吉州學正致仕老屋蕭然藜藿不糝巡按甘士价縣令  
 聶雲翰歎其清絕時加禮問張大  
 復傳



徐協祥諸生家居以孝行稱忽生並帶瓜人以為孝感所致弘

治初知縣楊子器上聞詔旌其里時千墩有王鐵匠者封股

愈親疾子器亦給匾旌之

康熙志參  
舊縣志

張安甫字汝勉和兄子弘治庚戌進士授祁州知州祁俗澆漓

安甫率以禮義民俗丕變其士椎樸少文安甫構洗心齋日

與諸生講學於是始有登進士者母憂歸除服遂上疏乞休

曰仕為養親耳親今安在耶尚書馬文升嘉其恬退奏加四

品服致仕時年未五十也先業在橫塘鑿方池作亭其上因

自號天方性夷曠好登覽吳越名勝無不游游輒有題咏視

聲利寵辱舉不足以役其心少嬰脾疾未艾即絕欲茹淡年

八十四呼子孫謂曰吾其歸乎又二日端坐而逝鄉人私謚

曰貞簡先生

王志堅傳參  
道光崑新志

毛澄字憲清舉弘治六年進士第一授修撰預修會典成進右

諭德直講東宮武宗立進左庶子直經筵以母憂歸正德四

年劉瑾摘會典小疵貶諸纂修者秩以澄為侍讀服闋還朝

進侍講學士歷禮部侍郎十二年五月拜尚書八月朔帝微

行澄率侍郎王瓚顧清等疏請還宮既又出居庸幸宣府又

留不返澄等頻疏諫不報明年正月駕旋命百官戎服郊迎

澄等請用常服不許七月帝自稱威武大將軍朱壽統六師

巡邊幸宣府抵大同歷山西至榆林澄屢疏馳諫不報十四



年駕還京卽諭禮部總督軍務威武大將軍總兵官太師鎮國公朱壽遣往兩畿瞻東嶽奉安聖像祈福安民澄復偕廷臣上言歷陳五不可亦不報宸濠反帝南征示威武駐蹕留都者踰歲澄屢請回鑾及駕返用江彬言將卽賜宸濠死澄據漢庶人故事請還京告郊廟獻俘行戮不從武宗崩世宗踐阼甫六日有旨議興獻王主祀及尊稱五月七日澄大會文武羣臣上議曰考漢成帝立定陶王爲皇太子立楚孝王孫景爲定陶王奉共王祀共王者皇太子本生父也時大司空師丹以爲恩義備至今陛下入承大統宜如漢定陶王故事以益王第二子崇仁王厚炫繼興王後襲興王主祀事又

考宋濮安懿王之子入繼仁宗後是爲英宗司馬光謂濮王宜尊以高官大爵稱皇伯而不名乃立濮王園廟以宗樸爲濮國公奉濮王祀程頤之言曰爲人後者謂所後爲父母而謂所生爲伯叔父母此生人之大倫也然所生之義至尊至大宜別立殊稱曰皇伯叔父某國大王則正統旣明而所生亦尊崇極矣今興獻王於孝宗爲弟於陛下爲本生父與濮安懿王事正相等陛下宜稱孝宗爲皇考改稱興獻王爲皇叔父興獻大王妃爲皇叔母凡祭告及上箋俱自稱姪皇帝某則正統私親恩禮兼盡可以爲萬世法議上帝怒命再議澄復會廷臣上議曰禮爲人後者爲之子自天子至庶人一



也本朝之制皇帝於宗藩尊行止稱伯父叔父自稱皇帝而不名今稱興獻王爲皇叔父大王又自稱名尊崇之典已至臣等不敢復有所議疏進帝命博考前代典禮再議澄復上議曰臣等會議者再請改稱興獻王爲叔父者明大統之尊無二上也然加皇字於叔父之上則凡爲陛下伯叔諸父皆莫能與之齊矣加大字於王之上則天下諸王皆莫得而並之矣當是時帝銳意推崇所生而進士張璁復抗疏極言禮官之謬帝心動持澄等疏久不下至八月命再議澄復上議曰先王制禮本乎人情武宗旣無子嗣又鮮兄弟援立陛下於憲廟諸孫中是武宗以陛下爲同堂弟考孝宗母慈壽無

可疑矣可復顧私親哉疏入帝不懌璁復進大禮或問帝益嚮之乃下澄等前疏更令博採輿論以聞澄知勢不可已謀於內閣而以皇太后懿旨行之加興獻王號曰興獻帝妃曰興國太后皇妃邵氏亦尊爲皇太后宣示中外顧帝雖勉從廷議意猶嫌之後復傳諭加稱皇帝內閣楊廷和等封還御批澄抗疏力爭又偕九卿喬宇等合諫帝皆不允明年嘉靖改元正月清寧宮後三小宮災澄復以爲言會朝臣亦多諫者事獲止澄端亮有學行論事侃侃不撓帝欲推尊所生嘗遣中官諭意至長跪稽首澄駭愕急扶之起其人曰上意也上言人孰無父母奈何使我不獲伸必祈公易議因出囊金



昇澄澄奮然曰老臣悖老不能曠典禮獨有一去不與議已耳抗疏引疾至五六上帝輒慰留不允二年二月疾甚力請乃許之舟次興濟而卒先是論定策功加澄太子太傅廕錦衣世指揮同知皆力辭不受帝雅敬憚澄雖數忤旨而恩禮不衰既得疾遣醫診視藥物之賜時至其卒也深悼惜之贈少傅諡文簡

明史

案乾隆志選舉澄列崑山注云分入太

故道光志為補傳茲

就明史本傳節錄之

周在字承德早孤力學家故饒盡為伯氏有羣季欲聞諸理在曰汝等必欲詣有司吾當言先人無厚積也羣季意沮伯氏亦悔悟以遺貲析諸弟在入贅吳氏吳所分產讓而弗受仲

兄卒議以在子嗣在念父元學欲置義田贍族未果及是乃請諸兄就仲產而割已產益之得八百畝置義莊立義塾以教族之子弟建祠祀始遷祖及族之無後者後舉弘治壬子鄉薦計偕春官疏上十事皆中吳中利病授養利知州即致仕子復俊別有傳

娛拙齋雜記

朱希周字懋忠文子舉弘治九年進士擢第一授修撰進侍講劉瑾摘修會典小疵降編修孝宗實錄成復官久之進侍讀學士擢南京吏部右侍郎閱五年召為禮部右侍郎時方議大禮數偕其長爭執會左侍郎吳一鵬奉使安陸尚書席書未至希周獨理部事是時張聰桂萼已召至益交章請去本



生之號帝悅從之趣禮官具上册儀希周率郎中余才汪必東等疏諫曰陛下考孝宗母昭聖三年矣而更定之論忽從中出則明詔爲虛文不足信天下祭告爲瀆禮何以感神祇且本生非貶詞也不妨正統而親之義寓焉何嫌於此而必欲去之以滋天下之議時羣臣諫者甚衆疏皆留中遂相率詣左順門跪伏希周走告諸閣臣曰羣臣伏闕公等能坐視乎亦偕羣臣跪伏以請帝聞大怒命希周與何孟春等俱待罪而盡繫庶僚於詔獄明日上章聖皇太后册文希周及尙書秦金金獻民趙鑑趙璜侍郎何孟春都御史王時中大理少卿張縉徐文華俱不赴帝怒責陳狀希周等伏罪復嚴旨

譙責乃已大禮遂自此定矣明年由左侍郎遷南京吏部尙書嘉靖六年大計京官南六科無黜者桂萼素以議禮嫌希周且惡兩京言官嘗劾已因言希周畏勢曲庇希周言兩京六科止七人實無可去者臣以言路私之固不可如避言路嫌誅責之尤不可且使舉曹皆賢必去一二人示公設舉曹皆不肖亦但去一二人塞責乎因力稱疾乞休溫旨許之仍敕有司歲給天廩林居三十年中外論薦者三十餘疏竟不復起性恭謹不妄取卒年八十有四贈太子少保瀕歿屬諸子曰他日倘蒙易名典勿犯吾家諱乃避文諡恭靖明史顧潛字孔昭鼎臣兄子弘治丙辰進士選庶吉士改御史庚申



奉敕往山東河南印信馬匹疏言馬政耗弊多出折色子粒  
俵買等項互累軍民乞復洪武永樂舊制度民力可寬軍政  
肅清上敕所司罷行之壬戌以疾在告輯唐虞以來事可爲  
法者附以論斷名稽古治要言祖宗列聖凡任官命將用刑  
行政必召輔弼侍從之臣講諭商榷邇來勢分殊絕君臣相  
遇不過視朝數刻而已願乞亟接臣下或召對便殿或臨幸  
內閣於以察納忠言訪求治理癸亥還朝上之上嘉諭留覽  
自此數顧問諸大臣人以爲潛實啟之畿輔災疏論時政入  
事皆見采納光祿少卿祝祥以附外戚進太常卿崔志端以  
道流累遷禮部尙書皆論罷之出督京畿學政以順德永平

諸郡士鮮知學擇其秀穎者令至京師從明師受業士風丕  
變正德初劉瑾用事吏部尙書劉宇瑾私人也其子爲畿輔  
令謁潛潛不爲禮銜之乃出潛爲馬湖知府旋以格例罷其  
官潛生平以禮自持燕居如對賓客嘗著慎獨箴以志警西  
北巴城河漫溢爲患潛爲築堤以便行旅家居事親於舍南

鑿池疊山爲展桂堂娛之

王張二傳合纂參康熙志

龔乾字敬法理之孫喜讀書不屑爲制舉義世父紱戒督之則  
取諸牘謔簽應制家名字摘槩伊吾不輟實則所誦非所督  
也以是名不隸學官籍而雋聲彌噪友人朱希周顧潛表爲  
駙馬賓客辭曰麋鹿野性終在長林茂草間大冠若箕何與



吾事耶去隱江上終身不入城市道光崑新志

周倫字伯明弘治乙未進士授新安知縣歲旱飛蝗蔽天倫虔  
禱三日大雨蝗死明年大水疏請賑貸長堤潰以粟募民築  
堤堤成民亦得食拜御史巡視居庸龍泉等關正德初奉敕  
勘太監李興擅伐禁林山木奏入上嘉其直聞父病請急歸  
而父已卒劉瑾用事以養疾違限勒致仕又以會薦都御史  
雍泰及論西庫布花積弊罰米三百石傾其家瑾誅復官疏  
請錄用謝遷劉大夏許瓚等劾大學士焦芳總兵張洪等上  
皆納之巡按山西奏築太原南關新城及武寧關土堡梁口  
濠塹久之陞南京大理丞進少卿嘉靖初遷僉都御史提督

操江擢兵工二部侍郎拜南京刑部尚書旋改北侍經筵時  
輔臣桂萼被論去詔逮其私人李夢鶴等下刑部張璉請解  
於倫倫不可無何璉召還仍出倫於南部三年謝政歸又十

年卒贈太子少保諡康僖王張二傳合纂

龔震字敬修領北治乙卯鄉薦通判漳州時王守仁平汀漳盧  
溪諸賊震領調兵食深入先登守仁將薦之會震有條議忤  
御史幾落職尋調守武岡州武岡王淫酒縱諸健奴不法府  
第逼州南門屠沽負販數受凌奪震一夕發卒百餘塞南門  
而穿一便門通往來諸奴震懼王亦不敢問亡何疾卒張大復傳  
徐懋字德美弘治甲子舉人授德安府通判府額設壽藩祿米



萬石千戶所屯米若干懋申革宿弊支放以時漢沔多盜懋  
為開塹築堡水陸寧靜民歌頌之進吉安府同知清解軍伍  
考校生童皆以嚴正得人心自吉安歸舟輕載螺山石以行

云道光崑  
新志

顧鼎臣字九和弘治十八年進士第一授修撰正德初再遷左  
諭德嘉靖初直經筵進講范浚心箴敷陳剴切帝悅乃自為  
注釋而鼎臣特受眷累官詹事給事中劉世揚李仁劾鼎臣  
汙佞帝下世揚等獄以鼎臣救得薄譴拜禮部右侍郎帝好  
長生術內殿設齋醮鼎臣進步虛詞七章且列上壇中應行  
事帝優詔褒答悉從之詞臣以青詞結主知由鼎臣倡也改

吏部左侍郎掌詹事府請令曾子後授五經博士比三氏子  
孫從之大同軍變張孚敬主用兵鼎臣言不可帝嘉納十三  
年孟冬享廟命鼎臣及侍郎霍韜捧主二人有期功服當辭  
乃上言古禮諸侯絕期今公卿即古諸侯請得毋避禮部尚  
書夏言極詆其非乃已尋進禮部尚書仍掌府事京師淫雨  
四方多水災鼎臣請振饑弭盜報可十七年八月以本官兼  
文淵閣大學士入參機務尋加少保兼太子太保本傳誤作  
太子太傅  
各舊志沿其誤今  
從宰輔年表訂正進武英殿初李時為首輔夏言次之鼎臣  
又次之時卒言當國專甚鼎臣素柔媚不能有為充位而已  
帝將南巡立皇太子命言扈行鼎臣輔太子監國御史蕭祥



曜劾吏部侍郎張潮受鼎臣屬調刑部主事陸崑為吏部潮  
 言兵部主事馬承學恃鼎臣有聯自詭必得銓曹臣故抑承  
 學而用崑帝下承學詔獄鼎臣不問十九年十月卒官年六  
 十八贈太保諡文康鼎臣官侍從時憫東南賦役失均屢陳  
 其弊帝為飭巡撫歐陽鐸釐定之崑山無城言於當事為築  
 城後倭亂起崑山獲全鄉人立祠祀焉明史子履方字仲立嘉  
 靖戊子舉人當父柄用曰謙抑如寒士卒贈尙寶司丞履方  
 子謙亨字嘉甫以蔭官尙寶卿簡約有守無忝清門世德云  
道光崑新志

陳汝翊字邦輔父奎字文瑞多隱德嘗盡焚逋券汝翊中弘治

辛酉鄉試選桐鄉知縣桐號劇邑陳案山積汝翊刻日限月  
 理之殆盡自奉廉謹卒於官監司郡守知其貧給舟歸其喪

民號泣送之道光崑新志

魏校字子才其先本李姓居蘇州葑門之莊渠因自號莊渠弘  
 治十八年成進士歷南京刑部郎中守備太監劉瑯藉劉瑾  
 勢張甚或自判狀送法司莫敢抗者校直行已意無所徇改  
 兵部郎中移疾歸嘉靖初起為廣東提學副使丁憂服闋補  
 江西兵備副使累遷國子祭酒太常卿尋致仕校私淑胡居  
 仁主敬之學而貫通諸儒之說擇執尤精嘗與余祐論性畧  
 曰天地者陰陽五行之本體也故理無不具人物之性皆出



於天地然而人得其全物得其偏又曰古聖賢論性有二其一性與情對言此是性之本義直指此理而言其一性與習對言但取生字為義非性之所以得名蓋曰天所生為性人所為曰習耳先儒因性相近一語遂謂性兼氣質而言不知人性上下不可添一物纔著氣質便不得謂之性矣荀子論性惡揚子論性善惡混韓子論性有三品衆言混亂必折之聖若謂夫子性相近一言正論性之所以得名則前後說皆不謬於聖人而孟子道性善反為一偏之論矣孟子見之分明言之直捷但未言性為何物故荀揚韓諸儒得以其說亂之伊川一言以斷之曰性即理也則諸說皆不攻自破矣卒

諡恭簡唐順之王應電王敬臣皆其弟子也明史校登進士時廷對擬第一上閱策有親宦官宮妾語置二甲與胡世寧李承勳余祐友善稱南都四君子校每訊重囚必齋居默念凡有冤滯人不能決者片言決之會審監刑時慘然澹服竟日不御酒肉提學廣東念入道者必自小學於是飭社學聯師儒取士先德行不專以文詞嶺南俗尚巫鬼所在多淫祠改創以祀先儒曹溪有六祖道場達摩所傳衣鉢在焉碎而焚之嫉邪過嚴或思中傷之有劾河南提學蕭鳴鳳者併劾校已而南御史論兩人皆碩學不宜左調乃改鳴鳳廣東校河南上蔡有羲皇畫卦臺久廢旁有三皇祠後混入佛氏校盡



蘇州府志 卷九十二  
毀佛像闕中門表白太昊伏羲開天聖蹟信陽宰子貢蔡人  
漆雕開向列鄉賢名宦改創書院祀之以司馬溫公謝上蔡  
祔焉當是時姚江王氏學方張校雅不以爲然尤惡楊慈湖  
之說斥爲逆天誣聖之書更不欲人爲詞章之學惟教人涵  
泳仁體使和氣發生則邪氣自消大要在養之於靜而已嘗  
與裴大典書教其於公私義利之辨猛著精神當此人欲橫  
流時壁立萬仞一毫汚染不得蓋其自信如此沒後贈禮部

侍郎

道光崑  
新志

周廣字充之弘治十八年進士歷知莆田吉水二縣正德中以  
治最徵授御史疏陳四事略言三代以前未有佛法况刺麻

尤釋教所不齒耳貫銅環身衣赭服殘破禮法肆爲淫邪宜  
投四裔以禦魑魅奈何令近君側爲羣盜興兵口實哉昔禹  
戒舜曰毋若丹朱傲惟慢遊是好周公戒成王曰毋若商王  
紂之迷亂酗於酒德今之伶人助慢遊迷亂者也唐莊宗與  
伶官戲狎一夫夜呼倉皇出走臣謂宜遣逐樂工不復籍之  
禁內乃所以放鄭聲也陛下承祖宗統緒而羣小獻媚熒惑  
致三宮鎖怨蘭殿無徵雖陛下春秋鼎盛獨不思萬世計乎  
中人稍有資產猶蓄妾媵以圖繼續未有專養螟蛉不顧祖  
宗繼嗣者也義子錢寧本宦豎蒼頭濫寵已極乃復攘攷貨  
賂輕蔑王章甚至投刺於人自稱皇庶子僭踰之罪所不忍



言陛下何不慎選宗室之賢者置諸左右以待皇嗣之生諸  
義兒養子俱奪其名爵乃所以遠佞人也近兩京言官論大  
臣禦寇不職者陛下率優容卽武將失律亦赦不誅故兵氣  
不揚功成無日川原白骨積如邱山夫出師十萬日費千金  
今海內困憊已骨見而肉消矣諸統兵大臣如陳金陸完輩  
可任其優游玩寇不加切責哉請定期責令成功以贖前罪  
寧見疏大怒留之不下傳旨謫廣東懷遠驛丞主事曹琥救  
之亦被謫寧怒不已使人遮道刺廣廣知之易姓名變服潛  
行四百餘里乃免武定侯郭勛鎮廣東承寧風旨以白金試  
廣廣拒不受伺廣謁御史攝致軍門箠擊幾死御史救之始

解越二年遷建昌知縣寧矯旨再謫竹寨驛丞世宗卽位復  
故官歷江西副使提督學校嘉靖二年舉治行卓異擢福建  
按察使鎮守中官以百金餽廣貯之庫將劾之中官懼謝罪  
自是不敢撓六年以右僉都御史巡撫江西墨吏望風去將  
限豪右田不果明年拜南京刑部右侍郎居二年暴疾卒嘉  
靖末贈右都御史廣初以鄉舉入太學師章懋在里閭與魏  
校友善平生嚴冷無笑容居官公彊弗受請託士類莫不憚  
之明廣少孤貧勵志篤學官莆田時鎮守中官於守令初至  
必要重賄廣獨徒手直入及下車廉公自敕不發私書不受  
請謁改知吉水吏事益精知建昌逆濠遣使肆行誅求悉禁



不與俄假公便歸崑再謫竹寨丞丞無房屋築茅舍居之與子弟講誦不輟會辰沉兵備構明山書院聚諸生講解辟廣為師詩文古淡自成一家言子士淹字儒享年十三從父竹寨慨然有志於學閱三載還以從魏校遊求復性之學事母以色養對妻子如賓客人稱篤行君子嘉靖丁酉舉於鄉

崑新志

張寬字德宏祖汪字時雨文雅調儻事親以孝稱由歲貢歷宜春潮陽訓導士論翕然既歸潮人立祠奉之父鑾亦以孝聞寬舉弘治乙丑進士授錢塘知縣縣附省奔走參摺日須秉燭方視事不以為勞省賦輕調民大悅服江漲壞民田寬力

請于上官發儲存活無算無賴觸齷禁嘯聚為亂寬下令撫定之卒以無擾定海有滯獄數年不決上官檄寬往一訊即服徵拜主事晉員外擢廣東僉事肅紀蒐敝悉有條次劇盜起寬督師擒其魁餘黨悉定以疾歸卒

道光崑新志

黃雲字應龍家貧好學嘗就藏書家借錄輒能記憶凡刑名錢穀水利算數軍旅儀制無不究心期為有用之學弘治中以貢授瑞州府訓導嘗廷謁監司恥之輒欲解組去時邵寶為提學劉璣為郡守待以殊禮屢慰留之丁外艱歸遂絕意仕進雲為文得眉山遺意一時碑版之作以出其手為重然非其好終不與歲饑見親族孤嫠時復收養雖屢空弗恤也性



方嚴不能作軟美態年七十餘卒王志堅傳

沈濤字洪伯魯孫父存城武知縣濤性孝友父病危每夜露禱

求代父尋愈授出二頃悉讓諸弟父卒於外號慟不食者累

月葬後廬墓三年有異烏靈芝之瑞道光崑新志同時有彭餘璋

亦以純孝稱

方鵬字時舉幼岐嶷能記憶前生事正德戊辰與弟鳳同登進

士授南京禮部主事歷刑部員外吏部郎中時大禮議興張

璉桂萼皆在南部謂鵬曰今上即位與宋英宗不同豈可援

為口實鵬曰英宗為濮安懿王少子仁宗親取而立之今與

獻帝止上一子與宋事遼絕繼統不繼嗣萬世不易正論也

因作書一篇以明之張桂喜甚未幾陞浙江參議遷山西提

學副使已而張桂議行改鵬右春坊右庶子充經筵講官主

順天鄉試遷南京太常寺少卿移疾歸家居十餘年足跡不

入城市詩文典雅不尚雕琢舊府志合纂

方鳳字時鳴初受學於兄鵬同登進士授行人擢南京御史母

喪歸服除改北京出按真定時武宗數事游幸鳳累疏切諫

在真定久當迎駕奏不能從詔者七事上皆優容之以疾假

歸病愈補故官尋復改南凡為御史歷南北四任嘗疏救胡

世寧薦王守仁楊一清呂柟魏校及論吳中水利事皆天下

大計嘉靖初張桂以議禮驟貴鳳力言其非以兄附張桂議



因并劾之復自劾以謝兄出為廣東提學僉事旋自免去鳳  
與鵬素友愛及鳳罷鵬亦移疾歸同居新瀆里鵬善病多不  
帷靜坐鳳性逸宕多管絃之樂山林觴詠未嘗不怡怡如也

王志堅傳參  
張大復傳

邢桂字思芳力田自給母宋性嚴厲每不憚輒長跪請命遇夜  
寒必令妻侍寢以溫其被嘗命市所嗜物二僅得其一母怒  
桂跪而受責不敢退時桂年已五十餘矣母素信佛臨終囑  
桂曰吾死當以舌舐吾目庶不迷冥途桂且哭且舐蓋棺而

止道光崑  
新志

柴奇字德美正德辛未與弟泰同登進士奇觀政吏部上書言

東南水利先以白茆為急次疏七鴉葺五堰且請以沒入逆  
瑾之資給濟工費尙書楊一清上其議特命工部尙書李充  
嗣董其事績用告成是歲授吏科給事中奉詔監軍山東討  
流賊所核功罪皆當明年賊陷曲阜闕里禮籍樂器皆焚蕩  
奇奏遷曲阜城以護聖廟九月凱旋賜金織鷲袍加俸二級  
內艱服除補原官陞南京光祿少卿嘉靖己丑遷應天府丞  
旋進府尹清勘官占地還之民積科試羨餘以拓貢院會南  
太廟災引咎乞休遂歸家居十餘年卒賜祭葬

王志堅傳

周震字世亨正德辛未進士授鄱陽知縣與勦姚源賊有功擢  
御史疏論八事皆切時政清軍福建擒斬煽亂黠卒劾鎮守



中官侵牟鹽利商民大悅出為浙江僉事遷廣東參議罷歸

周橐中蕭然

舊縣志

周鳳鳴字于岐倫子正德甲戌進士授刑部主事初任監獄卽

令吏卒滌楷檝潔圜室時給飲食手錄為監獄事宜後悉踵

行之歷員外郎中奉敕勘宸濠逆黨審覈詳慎無枉縱者鳳

鳴在刑曹久明練法律諸司重獄悉取決焉尚書李承勛知

其才以廣東司所轄錦衣旗校狡橫難制命攝其事數日理

積案殆盡承勛改兵部卽薦鳳鳴為職方郎中籌邊擇將皆

手自記注人莫敢干以私嘗繪九邊圖以獻欲上知邊隅要

害諸所建白承勛必咨鳳鳴一歲中上百餘疏皆出其手擢

大理寺丞張孚敬欲陷夏言假薛侃疏坐以至使諸大臣莫

敢異同鳳鳴獨論言無罪御史馮恩以劾孚敬江鋹下獄鳳

鳴擬赦條以為之地遂落職歸家居十八年薦者六十疏竟

不起事父倫及繼母至孝生平饒有心計廣廈數十間一經

握算尺椽片瓦無所漏鄉人以事就謀如其言輒得贏

王志堅傳

顧濟字舟卿正德十二年進士授行人擢刑科給事中武宗自

南都還卧病豹房惟江彬等侍濟言陛下孤寄於外兩宮隔

絕骨肉日疎所恃以為安者果何人哉漢高帝卧病數日樊

噲排闥警以趙高之事今羣臣中豈無噲憂者願陛下慎擇

廷臣更番入直起居動息咸使與聞一切淫巧戲劇傷生敗



德之事悉行屏絕則保養有道聖躬自安不報再餘月而帝崩世宗卽位之月濟上疏曰陛下踐阼除弊納諫臣民踴躍思見德化之成然立法非難守法為難聽諫非難樂諫為難今新政所釐多不便於奸豪權倖臣恐盤據既深玩縱未已非依怙宮闈必請託左右持法不固則此輩將叢聚而壞之此守法之難也唐太宗貞觀初每導羣臣使言及至晚年諫者乃多忤旨陛下首闢言路臣工靡不因事納忠高遠者似涉於迂闊切直者或過於犯顏若怒其犯顏其言必不入視為迂闊則計必不行此樂諫之難也尋復言內臣張雄張銳等誑誤先帝業已逮治又獲寬假願斷以大義俾無所售奸

帝頗嘉納既又劾司禮蕭敬黨庇銳等而三法司會訊依違

無大臣節不聽帝欲加興獻帝皇號濟言不可尋請侍養歸

越數年卒

明史 乾隆志云舊府志作太倉人案顧炎武顧氏譜系考濟父鑑於嘉靖三年徙居崑山其子孫

皆為崑山人故從明史採入又道光縣志云濟父鑑先世居新安鄉弘治中析置太倉因隸焉鑑又徙居千墩復為崑山人故選舉亦列入崑山是也

魏庠字子秀校從弟以貲補南京驍騎衛知事改光祿寺典簿

致仕庠襲父遺田數百頃多為德於鄉時里苦重役上戶多

巧免移之下戶庠獨自占其役俾得休息縣令郭楠嘗造庠

見廳事側有荒冢問故庠曰其子孫欲售之久矣與之直彼

不以治生而棄其骸骨於水火故寧存之楠日記有之杜氏



之葬在西階之下此古人誼也咨嗟良久而去先世出莊渠  
李氏族姓百數校歲廩有差庠踵而行之誠子孫世勿絕子  
希直字温甫好行義不欲入鄉領嘉靖乙卯鄉薦家居四十  
年散家資累萬金

道光崑新志

張羽字子儀幼孤家貧甚刻志向學讀書至丙夜不休母王篝  
燈繡績以助之勤苦萬狀無何有外家勾伍事波及母子囚  
繫所司憐其孤寡白之登正德辛巳進士授工部主事奉使  
權關以寬簡為商人所戴客過無所饋遺大禮議起偕廷臣  
伏闕諫廷杖幾死改南京刑部郎中罷歸中歲以哭母喪明

林居四十年卒

王志堅傳參  
道光崑新志

屈儒字汝為昉元孫少負遠志以清修自立為諸生時先塋前

隙地鄰學宮當道議闢為尊經閣出厚貲購之儒叩頭泣請  
辭旨愷切上官體其義事遂寢正德辛巳登進士會世宗登  
極詔求直言遂首陳嗣統大禮授南京大理評事進寺副寺  
正講讀律令覆讞刑辟以清慎稱戊子擢福建僉事分治建  
寧道所至洗冤剔蠹吏民感其威德引疾歸卒貧無以殮縣  
令郭楠為經紀其喪

道光崑新志

王同祖字繩武少孤善病常置帷中看司馬通鑑疾起悉了其  
義弱冠舉正德辛巳進士選庶吉士授編修同祖既積學讀  
書中秘益事宏博六經子史外陰陽曆律山經地志靡不記



覽爲文操筆立就大禮議起張孚敬驟貴一時諸臣死徙斥  
逐同祖亦在遣中孚敬卒始用薦起爲春坊校書尋進南京  
國子司業上疏請教世冑又請以薛瑄從祀孔廟庚子九廟  
災上言春秋哭災漢氏變服今詣陵題主宜比日中反虞之  
義不得吉服從事又言宗廟爲石室藏主謂之宗祏公羊高  
曰主藏廟室西壁中以備火災宜鑿石爲埴藏主其中以應  
古禮不報以言事忤旨落職通籍二十年立朝僅五歲未究  
其用人其惜之

張大復傳  
參舊縣志

張寰字允清安甫子正德辛巳進士授濟寧知州調濮州東郡  
有大賊詔書名捕不得寰陰誘其豪具得囊橐遂捕斬之丁

內艱服除補開州陞刑部員外郎乞養歸父喪服除授通政  
司參議尋致仕歸惟以圖史自娛好游名山初嘗從父觀雁  
蕩登天目後益縱意渡浙江抵武夷至匡廬還觀石鍾小孤  
采石九華黃山足跡幾徧東南又與尚書劉麟及名士吳琬  
陸崑輩十五人結峴山逸老詩社性夷曠多愛人望之蕭然  
有神仙之氣

歸有光  
墓表

徐申字周翰弘治甲子舉於鄉嘉靖初除蘄水知縣

乾隆志引  
舊縣志云

邑有迴風磯最險其上一港通圻湖達大江申案前人故蹟  
以竹籠箐石塞湖以土實港俾湖水不江江水不湖民以永

利改知上饒徵授刑部主事昭聖太后弟張延齡之繫獄也  
申奏記尙書聶賢唐龍言太后春秋高延齡旦暮戮何以慰



太后心宜援議貴議親例請於帝賢等深然之獄久不決始  
延齡下獄提牢主事沈椿不令入獄置別所繼者益寬假之  
脫梏拳通家人出入會大猾劉東山亦繫獄上告延齡有不  
軌謀憾前主事羅虞臣笞已因計及椿等帝震怒命執先後  
提牢主事三十七人付詔獄掠申與焉獄具當輸贖還職  
帝命杖之廷盡謫外任舊縣志謫申既謫官不赴歸與同里  
魏校方鳳輩優游嘯咏為樂久之卒明史學者以其居傍南川

稱為南川先生道光崑新志

朱景運字際甫夏曾孫父希陽字懋功官兩浙運判有幹局告  
歸晉階奉議大夫景運好學有文為從父希周所器許以諸

生入太學選授浙江按察使知事時兵燹甫平餘氛未靖諸  
曹多唯諾受成事景運獨參伍便宜條上之試輒效嘗隨慮  
囚使者讞獄景運多平反有以美妻故陷為盜者獄久不決  
景運訊白之民以為神遷廣州府經歷旋乞歸居山南寶玉  
堂經歲不窺戶後生輩無識之者獨故人張棟歸子慕時相  
款接邑令樊玉衡雅重景運造請賓席出語人曰不意今日  
得見三代以上人年八十三賦詩謝故交端然而逝道光崑新志  
顧邦石字孔安父式字正夫通曉世務成化中夏潦院檄勸殷  
戶捐賑式詣臺言富者未必肯踴躍恐就斃之民忍死趣利  
為害匪細惟通商可救目前因條陳便宜數十款事得寢積



餼久之貢禮部親老不就選以新例授杭州經歷邦石舉正  
 德癸酉鄉薦授南昌通判時兵變甫輯餘孽洶洶鎮守中官  
 交至苛索地方邦石繕甲補伍力為調劑湖賊萬學一負險  
 匿亡命出沒叵測率兵壯計擒之時郡守以下謁中貴人皆  
 庭參邦石恥之自劾歸道光崑新志  
 尤敷字尚虞本姓王以高祖贅外家遂襲其姓敷與中表兄弟  
 張情張意自少以學行相磨切嘉靖壬午舉鄉試授湖廣宜  
 春知縣改福建詔安銅山千戶運軍餉被劫諸縣多逮繫無  
 辜敷設法捕得正犯九人追取失金餘皆獲釋縣吏錮一元  
 赴京經行白葉峒為賊所殺敷募驍勇推以腹心不數日即

獲真盜御史徐某雅知敷悉以疑獄委之多所平反會監司  
 以刻核繩下八閩州縣吏坐事者十九人敷亦解官歸弟徹  
 字尚周早歲能文滄謹如其兄時稱二尤以歲貢終道光崑新志

顧夢圭字武祥潛子嘉靖癸未進士授刑部主事改南京吏部  
 遷郎中應詔陳言論六事尤論中官鎮守之害得旨撤還擢  
 廣東參議上疏乞罷採珠之役不報都御史陶諧議勦山西  
 猺空其地填以新民夢圭言猺不宜盡殺且新民畏其吞噬  
 而土兵厭猺山之荒落必不可居後卒如其言丁父憂服除  
 擢山東副使改河南提學副使遷福建參政平連江壽寧松  
 溪諸寇擢按察使陞江西右布政使致仕歸時年四十餘耳



夢圭為人敦重所至闔戶讀書自奉如寒素久滯外省非其

所樂嘗語所親曰北河權船者邪許之聲曰腰彎折此今人

以喻兩司官也歸有光誌長子允默字茂仁為文根柢理要宏瞻

駭博淨沈諸生間恂謹如處子恥談先世功閥遇游台貴介

輒障其面不與通病垂死聞子天竣及第索筆賦詩而瞑道

崑新志

顧夢川字禹祥夢圭弟性磊落好讀書父潛愛其該達悉以所

藏書相與品敘甲乙羅列於堂夢川擁之而坐常取大白置

兩楹間客至則沃之相與揚搯古今兼訂訛謬焚膏繼晷未

嘗少倦晚歲貢入太學益復棲心元理寄興淡漠既沒門人

私謚溇靖先生子允晄允烈終身不異財以孝友稱張大復傳

陸寯字宗周一字子端嘉靖癸未進士授禮部主事以劾方士

陶仲文忤旨廷杖謫浮梁驛丞歸里杜門謝客種蔬教子非

其分一毫不取仲文敗起為浙江僉事遷陝西副使時西陲

不靖寯立法鎮定遇大旱發粟賑濟全活無算秦民立祠祀

之秩滿以病歸卒道光崑新志

晉憲字邦彝一字其章父鵬為宣平教諭憲八歲父授以尚書

左傳及馬班諸史濂洛關閩之說能盡通之嘉靖癸未成進

士授工部主事時張璉在政府命二子從憲受尚書絕不與

暱權關荆南廉謹自守會疾在告三年補虞衡司主事營建



慈寧宮謹物料絕干請政府不悅適兵部失火延燒工部署  
論者詞連憲謫嘉興通判遷台州自免歸子驥字子良精軒  
岐之學作傷寒辯論數十篇學者稱樸菴先生

張大復傳

王燭字仲美嘉靖癸未進士授行人奉使魯藩岐郤餽遺遷刑

部員外累官南京太常卿署國子祭酒士慶得師就遷大理  
寺卿執法平允告歸卒燭體癯氣清德器深厚居家時振贍  
宗黨好行其德鄉里稱之

道光崑  
紙志

朱觀字顒伯萱從子嘉靖癸未進士授吉安府推官強及明敏  
郡有殺人而莫得其主名者獄久不決觀禱於神夢一人體  
無完膚觀恍然曰周身刑憲其周憲乎遲明訊之殺人者果

其妻之私人周憲也上官奇之類此者凡八事遂得旌異擢  
御史請放鷹犬清光祿積弊尋以言事忤旨廷杖二十既而  
巡按陝西黜貪墨吏若干人奏築花馬池至橫城堡邊牆一  
百六十餘里西陲賴之歷官河南布政使

王志堅傳

沈大楠字景明嘉靖癸未進士除東明知縣縣介三省為逋逃  
藪大楠布法令明教化葺學宮表冉子墓清豪強隱匿陞南  
京刑部主事調吏部出為延平知府以羅從彥李侗從祀孔  
廟黜澹灘多厲石破舟溺人募役鑿之民利涉焉以才調福  
州府出繫囚省郵傳罷通海市大豪無所牟利觸權貴調官  
再補惠州府棄官歸子紹慶字子善舉嘉靖癸卯順天鄉試



第一庚戌成進士授鄱陽知縣釐夙滯鋤豪猾罷衙前支應  
 丁艱服闋補光山縣均徭平賦除虛糧數千石省進葛之數  
 裁走遞之馬修邑志建義廩奏最陞儀制司主事進員外郎  
 督學雲南以母老乞養歸卒孫應明字鳴熙遷居郡城萬曆  
 己未進士累官兵部郎中降東昌府推官康熙志  
 秦鰲字子元嘉靖五年進士授行人擢兵科給事中劾魏國公  
 徐鵬舉中官賴義不法狀義罷還彗星見劾張孚敬妬賢病  
 國擬議詔旨輒引以自歸帝遂罷孚敬已孚敬再相汪鋮承  
 風旨以考察謫鰲東陽縣丞屢遷福建右參議卒官明史  
 引王志堅傳云謫東陽丞後歷樂清知縣九江通判德安同  
 知所至皆有善政陞湖廣僉事湖湘盜起擒殺不可止鰲為

薄稅緩役期年盜良已轉參議提督太和山時中官王佐主  
 香案頗為民害因投劾歸後起補福建遷副使入覲還道病  
 聞報遷按察使而卒鰲歷官中外多可稱獨其在省入御史  
 張祿譖論劾大同巡撫王大用大用賢者也以此頗不滿公  
 云論

周果字世高居同邱里為諸生力學嗜古時尙科舉業果獨究

心性理諸書性嚴格對客終日無惰容嘗銘其座右曰寸心

不愧鬼神隱居教授出其門者多所裁就參政周大禮按察

使張憲臣皆其選也晚以齒德資於鄉道光崑新志

梁鳴鸞字九章統子好學博覽有知人之識歸有光幼時鳴鸞

一見許以國士嘗作史論四十卷所至必以自隨嘉靖初以

貢授黃岡教諭舟行至青山磯風波大作舟幾覆鳴鸞攝衣



危坐數問從者史論在否語不及他晚歸食貧時顧鼎臣在政府家人謀謁之度其必不可乃託他事入舟既而覺之指河水自誓家人惶遽反鳴鸞受業弟子多顯人秦鰲嘗欲刻其書而不果今其書已亡而歸有光所爲序尙存

王志堅傳

王三錫字汝懷嘉靖八年進士授光州知州俗刁悍難治強宗豪族輒置耳目於守左右三錫至發摘姦隱不少貸喜與諸生講學經指授而後爲名臣者若劉繪喻時李時春其尤著也有吳道南來充掾吏三錫一見試以文奇之延課諸子道南後竟登第州人鄭坤以御史家居戚屬倚之縱暴鄉里三錫悉捕治之還所侵民田十餘頃坤銜之媒孽于直指王儀

罷其官年未三十坤死光人爲立生祠祀之三錫性坦直無城府父歿時遺貲頗厚悉以讓諸弟曰吾將以是慰吾親地下也卒年七十

康熙志

孫雲字從龍少時父戌死桂林雲徒步往得父骨於昭平壘函之以歸將渡江旋風忽起舟人覺有異得其所函骨擲之江雲躍入江中攫得之泅行里許卒抱函以歸嘉靖己丑登進士授刑部主事進員外郎御史馮恩因星變論大學士張孚敬方獻夫都御史汪鋐三人姦帝大怒逮下錦衣獄移刑部欲致之死雲抗言曰御史得風聞言事又以星孛應詔何罪卽毀譽過當法不當論死議減戍上帝愈怒褫尙書王時中



職奪侍郎聞淵俸謫雲朝陽典史又謫廣西之懷遠尋遷增  
城知縣歷陞湖廣僉事福建參議部有礦賊嘯聚千人為亂  
雲親率兵勦平之擢江西副使引疾歸雲晚居鄉頗不協衆

論者惜之 王志堅傳明史馮恩傳

吳中英字秀甫一字純甫生而奇穎好讀書父為置書千卷恣  
所欲觀童年入鄉校及長師事黃雲為古文詞試輒高等縣  
嘗召役其父中英抵書縣令方豪豪年少有文學莫可當意  
得書以為奇引與游甚歡自是名日益起性豪舉不拘拘小  
節父卒遺貲甚厚中英視故券有不能還者悉焚之又好娛  
樂以聲色六博自豪傾其家久之乃更折節自矜平居與其

徒考古論學雖先儒已有成說必反覆其所以不為苟同所  
獎許多成佳士李憲卿歸有光皆於未知名時預以遠大期  
之人以為神而中英猶為諸生嘉靖辛卯舉於鄉年四十四  
矣試禮部不第益厭世事營城東地藝橘千株鬻以自給閉  
門不復有所往還惟令兒女環侍几旁誦詩書而已 王志堅傳

周復俊字子顛在子舉嘉靖壬辰進士歷工部主事員外郎郎  
中陞四川提學副使請託不行蜀人以刻覈中之後歷雲南  
副使左布政使遷南京太僕卿致仕復俊器度純雅風神韶  
令弱冠與王同祖顧夢圭稱崑山三俊居官貞介三十年如  
一節少游方鵬之門精研理要在滇時與楊慎切劘其學益



進生平敦內行母吳性嚴切小拂意輒呵責復俊即長跪色解乃已入蜀行九坂崎嶇地車上驚呼復俊必下車扶掖至平地始復升車偶因酒過母識之遂止酒至老不御方授箸日兄選膏腴而以汙邪與復俊值歲荒復俊獨有秋復推其半與兄終身敬愛無間言

張大復傳列朝詩集參道光縣志

陸郊字子野諸生世居雞鳴塘俊邁力學祖天秩以貴雄於鄉至郊家日落晨昏不給不顧也與武進唐順之海鹽錢薇為文字交薇嘗雪夜訪郊室中乏卧具遂藉草為榻清談信宿以去嘉靖丙辰直指尙維持訪人才於華亭莫如忠如忠曰有陸子野者詩類孟襄陽書類顏平原人品類王儒仲真高

士也直指遂折節過存延之行館郊葛衣芒屨上坐不讓人兩賢之年止四十四臨歿呼其子應陽朗吟王維詩且曰他時毋溷刻吾詩古名家流傳無窮者多不過二三十篇餘皆書蟬木蠹無益也周復俊嘗序其集

道光崑新志

秦雷字起潛孝友淳謹精易理發明聖人開物成務之意為學者所宗弘治甲子領鄉薦授元氏知縣歲大饑減耗革弊政在惠民告歸環堵蕭然常不自給元氏民肖像尸祝之

道光崑新志

陶文淵字靜夫領正德己卯鄉薦久不第授南京工部司務凡數年減浮費萬計吏不勝察覈以事中之出為興化檢校遷



連城知縣連方有海寇文淵繕城築堡厲兵寬徭寇不至邑人愛而祠之擢建寧府同知調知西華縣屬大水薄城文淵晝夜雉堞間誓自沈以謝水水驟退績最當遷遠拂衣歸囊橐蕭然自題其室曰定齊卒之日幾無以為殮云道光崑新志

周大禮字子和嘉靖壬辰進士授刑部主事坐註誤壽寧侯事謫鄧州同知遷汝寧府同知轉南京工部郎中出知興化府郡多豪大禮一以法裁之諸豪相與譖於御史御史初疑之遣吏猝取紙贖簿牘大禮立吏庭下封簿畀之勾校無一漏失御史大服遂竭力薦之歲大饑請發廩賑貸訪宋趙抃救荒法隨地散給自以肩輿行視不問窮鄉幽谷時米價騰踊

大禮故高其價於是商販輻輳價立減修木蘭陂二十餘里以備旱潦稽覈田賦以清下戶之產廢稅存者治郡七載惠政甚多擢廣東副使有兇徒十人號十條龍為患一方大禮莅任十條龍乘軒來謁大禮即拘而杖殺之舉國稱快憂歸服除補山東登萊副使御史何廷鈺議鑿膠萊河以便漕輓大禮以河塞日久縱竭人力不能成流議遂寢擢河南參政坐大計拾遺免歸王張二傳參道光崑新志

王三接字汝康初與兄三錫齊名三接嘉靖乙未成進士授長垣知縣治最有聲而鄰邑御史以私怨欲黜之吏部尙書許瓚不聽調浙之景寧中官奉命開礦三接持不可既開無所



得中使慙且怒三接名益著遷南京禮部主事歷員外郎中  
 出爲柳州知府張岳統兵征馬平寇議於千蔓村置堡調狼  
 兵守之三接謂狼兵與土民雜處必不相安請戍以土著之  
 僮必不倍德岳善之以柳城北枕平野寇警所首及闕舊址  
 更築之因力於兵因工於餉民不知役柳人賴焉調知澠江  
 府遷河東都轉運使免歸張大復傳  
 鄔景和嘉靖二年尙孝宗女永福公主嘗奉詔直西苑撰玄文  
 以不諳玄理辭帝不悅時有事清馥殿在直諸臣俱行釐祝  
 禮景和不俟禮成而出已而賞賚諸臣景和與焉疏言無功  
 受賞懼增罪戾乞容辭免俾洗心滌慮以効他日馬革裹尸

之報帝大怒謂咒詛失人臣禮削職歸原籍時主已薨矣三  
 十五年入賀聖誕畢因言臣自五世祖寄籍錦衣衛世居北  
 地今被罪南徙不勝犬馬戀主之私扶服入賀退而私省公  
 主墳墓封邱翳然荆棘不剪臣竊自念狐死尙正首邱臣託  
 命貴主獨與逝者魂魄相弔於數千里外不得春秋祭掃拊  
 心傷悔五內崩裂臣之罪重不敢祈恩惟陛下幸哀故主使  
 得寄籍原衛長與相依死無所恨帝憐而許之隆慶二年復  
 官卒贈少保諡榮簡明史從兄克忠字時弼嘉靖甲午舉人授  
 廣東潮陽知縣調廣平以稱職聞致政歸與景和優  
 間閭里榮之道光崑新志









